



Preis: Fr. 3.--

Schnitzulbank 2010

Fasnachtsgesellschaft Muotathal

Guät Tag midänand lär liäbä LÜüt
iär sind üs härzlich willkommä hüt
all wettid wieder wüssä, was ds letscht Jahr isch glaufä
das cha jedä vernäh, wännr tuäd ä Schnitzulbank chaufä

Wänn einä scho dr Wäg i das Blettli duät gfindä
dä muässr wägä dem nu wiitniänä afä spinnä
da drinnä nämmr jedä ischr gross odr chlii
isch im Ried vor odr im Bisisthal innä gsii

Vo dr Balmä bis is Pub hend zwee Burschtä midämä Rasämeier a halb Stund gha
Wos det acho sind, heds ordäli zuätah
Duä hättid diä zwee schiär chönnä i d'Luft gumpä
Zwüschä durä hends halt nu muässä Moscht fassä und Pneu pumpä

Am Grümpelturniär gads allig änu heiss zuä und här
A drnah fürtigä wird det allig z'Gwand nu schiär z'schwär
Ufsmal hend ä hufä Frauä i dr Bar uf ihräm Natel afä umätippä
Will ä jungä Burscht hed afä strippä

Amä grossä Hufä isch bi dr Starzlä glägä Holz
Vater und Sohn hend diä Trämäli vārsagt mit Stolz
Doch imä sonä Hufä innä hednä das nüd äso viel gnützt
Mit um BMW und Abschleppseil hends duä diä Trämäli z'wäggrützt

Uf dr Glattalp hend d'Lüüt änu eisch Augä gmacht
Zwee Mannä hend z'mitzt där Summār gha Fasnacht
Usum Bähndli usä sinds mit Brüllä, Schnorchel, Kapput und Flossä
Und hend i dr SAC äso d'Ussicht ächli gnossä

Bim Sekundälim verbirgt sich immär ä chlini Gfahr
Anärä Frau hed ä Tubä a dä Finger g'chleubt, das isch bitterwahr
I ihrär Not ischi duä ufsmal is Töbälärs Budä innä gsi
Und det sinds mit ämä Winkulschliffer a diä Tubä hi

Au imä Parkhuus muässmä öppis studiärä
Mä sött det niä ohni Billett gu parkiärä
Ä jungä Maa chönnt da nu äs Liädli singä drvo
Är isch nämlich mit samt dr Schrankä us dem Parkhuus usä cho

Ä Chäschuächä vos Konditors isch eisch gsi nüd prezis durä
Das hed ä Frau zimli brungä zum Chnurrä
Zrugg bringä hed diä Frau der Chuächä wellä
Hättsä ächt nüd drheimä nu eisch sälbär chönnä ischtellä

Am Vehmärcht stahd z'Veh alig im Vordergrund
Bim Ablah und Heigah laufts det alig zimli rund
D'Stöösler Buurä hend am Namittag am 2 nu ihräs Veh abundä gha
Gu chipä isch duä einä, will är das nüd hed chönnä verstah

Bi dr nüä Chäsäri z'Chrüz hed einä änu muässä Isprach machä
Willum dank nüd passäd hend drnah für Sachä
Bi dr Eröffnigsfiir wos duä gratis hed gäh z'ässä und Wii
Sig gnau dr säb aber alls erschtä det gsi

Im Lanzig hed ä Buur ä grossä Mischstock gha
Drum hedärä alig im Bürgäli hindä anä Hufä tah
Doch färä hed är wägum Schnee der Plätz nüd chönnä nützä
Churzärhand hedärä gad inäs Tobel afä stützä

Z'Chrüz obä hed eisch ä Hüttä brunnä
Für diä hätts gäh ä chächi Värsicherigssummä
Acho ischi duä z'mitzt i dr Nacht
Will ä Urner hed äs Füürli gmacht

Bim altä Polizihuus hed d'Füürwehr änu eisch ä Üäbig gha
Wo sie fertig gsi isch, heigids ä ding afä zämä schlah
Verchauft wärid det diä altä Fänschter nu wordä
Doch nach der Üäbig hed mäs gad chönnä entsorgä

Ufs WC hed einä müässä bim Schaffä
Undäräm Gschäft vürrichtä hed är nu muässä ufs Natel gaffä
Bim Füdläbutzä isch um duä das Handy nümmä z'Sinn cho
Bim Spüälä isch ächli mit um ganzä Hufä drvo

Dr Skitag vo dä Senioräfuässballär duäd ä all Jahr glingä
Bis am Abig tüänd det di eintä allig flätt spinnä
Drnah fürtig tüänd da derbi zimli all Gfährä värgässä
Hend doch zwee Kaffeegläser afä ässä

Zwee jung Mannä hend eisch nüd gwüsst was machä
Da hend si dänkt, sie bringid d'Lüüt ächli zum Lachä
Vorum Volg hed mä diä zwee chönnä gschauä
Wes anänand bodä-äbä hend afä d'Haar abhauä

Mit um Gösulwagä fahrä das tuäd üsä Güslär verstah
Au tuäd är immär zwee Hälfär bi sich ha
Im Tal hindä hed ärs duä abär ufsmal nümä gha därbi
Sie sind duä immär nu ächli im Ried vorä gsi

Nach um Cupfinalsieg vo dä Tschüttälär isch gangä gadächli herbi
D'Freud isch bii allnä riisägross gsi
Feuchtfröhlich isch duä gsi das Siegesfäscht
Einä isch duä abär midämä brochnä Wadäbei is Näscht

Ä jungä Maa hed änu eisch gha ä Idee
Ich glaubä äso öppis hed nu nüd mängä gseh
Dr Bediänigschaschtä vomä Chranä isch nu umä Buuch gsi vorhandä
Und suscht isch är füdläblutt uf derä Buustell gstandä

Ä jungä Maa hed eisch gha z'viel Alkohol
Nadignah hed är am Tisch gschlafä endär wohl
Doch der Schlaf hedä duä um di lätzä Kollegä umä breicht
Einä vo denä hedum duä a Ruggä anä gseicht

Ä jedä Wirt würd gärä d'Beiz voll ha
Will abär sältä öppär umä isch, hed ärs nüd chönnä värstah
Mit ärä schlauä Idee hed är das wellä kompensiarä
Är hed ä dä Lüüt hei afä telefoniärä

Gu schwarznä nach um Usgang sind änu eisch äs paar
Usgartäd wär's duä bi eim Haar
Dr Ältischt wo det isch gsi hed duä all übertroffä
Nadignah hed är ganznig Stüähli verussä gworfä

Nach dr Hinterthaler Chilbi isch ä jungä Burscht nu mit um Auto umägschossä
Drbi isch är gsi flätt bsoffä
Um di hindär Brügg hed ärs duä nümä chönnä kontrolliarä
Bim Schlüssel änä hed är öppä viär Auto afä traktiarä

Im obärä Bisisthal hed einä am Schneerumer zimli gha ä kä Freud
Und wo duä d'Rächnig cho isch, isch är wordä zimli teub
Di ganz hed är duä nüd wella beglichä
Ä medä d'Hälfti heig är duä wellä strichä

Dr Korpis hätt einä müässä machä im Militär
Doch diä Lascht isch ufäm Magä glägä zimli schwär
Nachum Urlaub isch är duä igrückt mit samtum Hund
Äwäg cho isch är wills gmeint hend är sig im Chopf nüd ghörig gsund

Vomä Kolleg hed eisch einä dörfä z'Auto ha
Uf Schwyz usä isch är duä änandäränah
Als Dankeschön hedärum duä nu äs paar Liter Moscht inäglah
Doch der Bliifri hed a dem Diesulmotor nüd äso guät tah

Bsoffä sind äs paar jung Mannä gu z'Alpärösli bsuächä
Wos gangä sind hends duä zerscht abär nu einä müässä gu suächä
Wosä duä gfundä hend, isch der Burscht zimli wordä verlägä
Anstatt drheimä isch är duä füdläbluttä im Alpärösli inä glägä X

Z'Fischä im Bisisthal tuäd ä Burscht au niä meh värgässä
Will är diä Fisch nüd sälbär hed chönnä frässä
Drii Fisch hätt är duä nämä usä zogä
Doch ä Vogul isch duä mitnäh drvo gflogä

Ä jungi Frau hed d'Wält ä eisch nümä chönnä verstah
Sie hed amä Morgä mit ämä Garagetor äs Problem gha
Hindärsi us dr Garage usä hed sie duä wellä änandäränah
Duä hed das Garagetor ä nahglah

Amä Jahrgänger im Huskycamp hed einä zimli gärä gha dr Alkohol
Fuhlä isch är duä wordä und äs isch um gsi nümä ä so wohl
Äs Bett hed är duä nu harglii gfundä gha
Bis i heiter Morgäd hedärsi imä Gästehüttli vertah

Ä Mänär odär d'Ski sött ufum Stoos derbi ha ds Liftpersonal
Hends das nüd isch das wäns windäd zimli fatal
Ä Liftler hed das eisch zimli müässä büässä
Z'Fuäss hed är duä vom Froni i Stoos apä müässä

Bim Wärchä tuäd ä Chef zimli z'Gäld rüäh
Wänn d'Arbeiter öppis hättid wellä hends alig schiär müässä apä chnüä
Trotzdem hätt der Chef wellä äs Firma-Ässä ha
Doch d'Arbeiter hend duä gmeint, är chönn fröhli ällei gah

Nachum Usgang hed einä gha äs ubändigs Rissä
Är hed notwändig müässä gu schissä
Bis Chef's Budä hed är duä das Gschäft chönnä vërrichtä
Wo am Morgäd d'Arbeiter cho sind, hed är ä usum WC usä afä brichtä

Arbät gid äso ä Schnitzulbank z'dichtä
d'Lüüt wüssid drnah au eh öppis z'brichtä
i dr Fasnacht söttmä äs Gschpässli ärlidä
susch tuäd mä am beschtä dähäimä bliibä

Soo, ich glaubä äs täts jetzt wieder fürnäs Jahr
das wo miär gseid hend isch meh odr mindr wahr
wänn einä meint är chöns bessr bringä
dä channär z'nächschd Jahr ä ga hälfä singä